

江孝通遺集卷三

花源集

戊寅

寶劍篇

嘗見健兒售劍東市，人無問者，感而作此。

健兒健兒，不共劍生死，抱劍攔街買東市。血花斑駁三尺長，未曾出匣先光芒。風沙捲地開邊疆，雪花漫天當戰場。深山大澤驅蛇狼，仇家恨族屍道傍。青虬夭矯虹霓翔，劍之出沒非尋常。四郊伏莽蝟毛起，大吏黃網睡初美。虎役巖巖厲牙齒，土豪孤寡人妻子。白晝尚聞神鬼號，霜鐔詎可藏秋水？健兒健兒，不共劍生死，風塵湏洞誰知己？魯莽粗，文弱靡，吁嗟寶劍長已矣！

哀江頭

哀江頭，三月九日無完舟。怪風割人肉，魚鼈上船游。風吹一尺浪一丈，大船小船皆震蕩。雲翻海底天黑愁，妖龍掉角森相向。虛空游魂滿拍塞，三寸紙幡招不得。

廣州紀災行

白鵝激水飛銀刀，割波鑱雲流黑膏。魂魄魄魄水怪逃，金鎖掣斷天神號。電母揚千鞭，雷公沸萬鼓。海潮壁立浪山怒，蛟龍行空魚鼈舞。勢愈衝突威愈張，青天黑墨人糜漿。雷聲起，人聲死。霾雨盲風不肯止，焦頭爛額火光裡。浮屍斷江流，瓦礫成川丘。是何妖物潛騎虬？白日橫逆出海游。海波浩無邊，夜叉口流涎。怪雲橫捲鬼滿地，腥風下括人上天。君不見大觀橋碑駝肩鼻，新鬼基樹根沉淵。平時颶力一毫撼不動，此時皆向空際來盤旋。上天震怒人難禱，有時洪力回蒼昊。收雲返風火盡滅，但苦精誠不能到。紅毛夷，肆猖狂，切雲摩霄天主堂。毒痛中國豈一日？民困瘡痍性命失。大吏心肝黑如漆，煩冤叫號呼不出。苟能請命為蒼生，跳梁小醜安橫行？百萬生靈冀一悟，天心深苦誰為明？

雨後

為愛遠山色，雨餘沙岸行。空林墜殘滴，繞屋流水聲。釣子踏孤艇，荷花開晚晴。鳬鷺亂波影，刷羽溪頭明。草色不可斷，開晴見遠垌。西山幾重翠，作意向人青。藻暖魚吹沫，花深蝶養翎。物情閑處得，好鳥一聲聽。炎風吹不到，着我草亭間。花竹秀而野，林巒多更閑。蟬聲清似水，人意靜如山。翻訝沙鷗侶，隨波日往還。書篇遊物象，門巷遠塵囂。掃榻尋莊蝶，焚香讀《楚騷》。境閑心自活，人懶跡成高。妙理誰能得？歡然醉濁醪。

老圃從人學，閑吟只自娛。晚風涼豆莢，微雨長花鬚。巧意看蛛網，機心笑轆轤。浮名漫相混，著述老潛夫。

思往

條條冰柱濕紅絃，幅幅屏山隔紫煙。骨髓香同古刺水，性情柔過博山煙。六張五角多乖舛，兩意三心半強牽。帶墜金魚思往事，書沉青鳥動經年。

願向香叢作返魂，又妨紅豆剪同根。閑將斑管書花押，愛把銀燈照酒痕。綺閣月來星自媚，羅幃春去薦猶溫。酸辛何必〈長生曲〉？天上人間那可論！

西燕東勞意若何？袖籠銀手舞婆娑。愁聽蓮子〈傷心曲〉，忍學楊花〈連臂歌〉？一縷冰紋纏虎繭，幾回珠匣折龍梭。不須更說經行地，冷雨飄燈獨自過。

輓趙翁仁甫

耆舊君能說，風流我獨思。忘年交正好，上壽竟難期。金石收錢帖，丹黃剩課詩。雞飛舍相接，一過一淒其。

哭駱樹人

力向青燈盡，心傷白髮多。同聲悼寥落，古道竟如何？漏雨翻書卷，淒風入輓歌。芳蘭掩幽艾，為子一滂沱。

西堂先生手書書譜見貽即集譜字爲長句走謝

吾宗先生當少年，輕揮柔翰書妙妍。方寸小楷日十千，真實本領迫宜官。五經秘製窮毫端，縹題翠櫝窺龍鸞。

時人接門求不得，獨發精神貽妙墨，絕倫逸氣同飛勒。人書俱老真通靈，體態一變《靈飛經》。寂寥佳境白石評，今世重睹孫過庭。過庭論書信微妙，義獻鍾張推領要。執使轉用詳指歸，短長淺深安可違？五乖六合有優劣，一入一代有存闕。柔媚固知不足道，骨氣所在挹餘烈。假令緘秘矜當時，今日安能有所思？嗟余小子好八法，心手昏迷拙摹擬。先生有意導先路，為吾臨摹數十紙。手疾如風目如水，藻灑波瀾墨花美。是知筆正先正心，神明在人無古今。果然一卷相思字，化作青琴海上音。

嚴先生釣臺歌

雲臺之高，高不如富春山；淮陰之名，名不如七里灘。非山川之能得高名，高名皆由德先生。非先生之能得高名，高名亦由光武成。君不見晉重耳之於介子推，心雖欲隱身為灰，尚得披羊裘徜徉於斯臺。

捉搦歌

男兒七尺好身手，仰天鳴鳴擊瓦缶。黃泥一丸作龜紐，不能得時終不久。海底惡蛟有時睡，山中猛虎有時醉。假令投鼠不忌器，腳踏四方無不利。七綵寶珠絡大鼓，手挾蘇合背弓弩。少年馳騁不知苦，汝今獨自當門戶。龍聰在角不在耳，象用在鼻不在齒。女兒生得十分美，搽脂傅粉徒爾爾。玉不療飢誰謂寶？婦不生子誰謂好？窮居無事白髮早，男兒安忍此終老？

車遙遙

車遙遙，馬足驕，朱輪翠轡金步搖。隱約二八剛垂髻，馬如游龍車如潮。金鞍玉勒繫馬腰，春風暖雲青鳳翹。煙爐裊絲晴天飄，夏玉琮琤聞珮瑤。女樂小隊吹瓊簫，未許朱鳥銜紅綃，飛塵十丈灑不消。扈從屯雲仰鼻息，飛箭流星馬路直，九衢一衝人辟易。車遙遙，非車力。

天上謠

三十六宮開紫房，群仙上壽朝玉皇。星冠雲衣風佩裳，前驂赤虬後鳳凰。珠劍陸離（一）森銀芒，畫竿龍竹交排行。擎雲走電驅白羊，金甲神將虬鬚張。眼大如箕照四方，手擎白羽射天狼。雲車珊珊花海香，倒舉北斗斟元漿。口歌踏踏敲琳琅，願天無極壽且康，願地無疆樂未央。嫦娥掌燈明月光，青煙鰲背鋪紅霜。織女欲渡愁無梁，翩然拂袖銀河長。

【校】

（一）原文作「雜」。

榆林哀

廖丞說榆林饑民狀，因有感焉，為作榆林哀。

榆林哀，風蕭蕭。榆林城，草木焦。平時尚不飽糠粃，沉在饑饉無青苗。廖丞到官發官粥，平地雪深沒人腹。

嚙冰僵死十八九，城市公然食人肉。豈無慘怛呼？忍死爭須臾。吸泥如太羹，嚼樹當肉糜。四野茫茫行旅絕，九衢寂寂人蹤滅。富家逃亡剩大屋，屋底饑民面無血。九重嶺，何盤盤！無定河，何漫漫！夜行晝且伏，敢認逃亡官？收召魂魄天西頭，廖丞倉皇歸惠州。天陰地黑向我語，尚覺鬼哭聲啾啾。我聞其語正當食，食不下箸咽不得。黯然作歌歌酸辛，收筵撤饌勿復陳，飽時不忍聞饑民。

和陳元孝懷古

十首

燕臺

莽莽風沙黯草萊，平原日落見層臺。生王白刃劫無術，死士黃金買得來。老去雄心唯引劍，消沉駿骨且銜杯。燕南燕北多秋思，易水寒流去不回。

姑蘇

輕俠無知說劍豪，孤城明月虎丘高。跡沉魚乙專諸巷，魂逐鴟夷伍相濤。響屧廊花春寂寂，錦飄涇水去滔滔。於今更動遊人感，麋鹿來疏長野蒿。

楚中

兩岸猿啼對九嶷，美人香草重相思。風淒斑竹千年淚，日落黃陵二女祠。湘水無情波浪闊，巫山有夢雨雲癡。紅蘅碧杜芳懷抱，莫更行吟續《楚詞》。

咸陽

關河百二連天起，男女三千入海行。笑爾一傳無寸土，替人萬里築長城。中條日落頽王氣，東渭潮奔激戰聲。六國銷沉秦鹿失，驪山憑弔不勝情。

沛中

高臺一曲罷歌風，置酒當時說沛宮。不分暮年思猛士，本來天子是英雄。龍經大澤妖蛇泣，鹿得中原走狗功。淒絕亡秦楚三戶，烏江誰為弔重瞳？

洛陽

連雲宮闕鬱嵬峨，甲觀銷感逝沉波。愁向青山聞杜宇，怕看荊棘泣銅駝。黃流九曲秋聲起，白嶽三條暮雨多。誰向東都問遺跡？牡丹花下有哀歌。

蜀中

高光大業創終難，吳鄴餘宮跡已寒。魚水君臣憐地促，蠶叢道路極天盤。三分日月中興局，五丈風雲上將壇。秋草春花甘寂寞，吞聲野老蜀江干。

鄴中

漳水滔滔起夕煙，遺宮空自對晴川。奸雄直欲千秋掩，兒女難捐一割緣。雲壓銅臺終墮瓦，火燒赤壁斷歸船。老來欲作喬家婿，話到東風轉惘然。

金陵

斧劃長江弔勝朝，鍾山王氣黯然消。鶯慵燕懶空惆悵，虎踞龍蟠也寂寥。狎客春燈瓊樹曲，美人歌扇碧桃簫。只餘明月偏無賴，猶照秦淮舊板橋。

隋宮

迷樓秋蘚冷銅鋪，盛飾離宮築五湖。空有錦帆來白下，可堪玉樹問黃奴。草深秋院唯螢火，花發春堤滿鷓鴣。六代適開唐社稷，垂楊零落入寒燕。

秋柳

千萬難攀離恨條，冷鴉單馬影蕭蕭。飄零客自憐枯樹，分付人休上灞橋。暝色最愁金塞遠，脆魂都向玉龍銷。秦淮別有興亡感，寒水疏煙話六朝。

